

關愛的故事



增值自強走我路

我叫阿絲，係巴基斯坦人，喺香港出世同讀小學，所以廣東話好流利。

8年前，我因為受唔住丈夫嘅虐待而離婚。一個人帶住只有3歲同1歲嘅仔生活。喺我地嘅社會，係接受唔到離婚婦女，最初要面對同鄉嘅歧視目光，我覺得好難受，仲經常發脾氣打仔嚟發洩。

喺呢段難過嘅日子，好在有一班香港人嘅朋友支持我，幫我重新振作。我參加社區中心好多唔同嘅課程，努力學習英語、美容、手飾設計等嚟充實自己，仲喺中心踏出我事業嘅第一步，就係為街坊提供美容護理服務，同時又設計首飾，做完放喺朋友嘅舖頭度寄賣。而家，我唔單只喺社區中心教授為少數族裔婦女而設嘅美容班同手飾工作坊，仲會到安老院為長者「做 facial」。

以前講我是非嘅同鄉，當有困難嘅時候，例如要睇醫生或者要向政府部門查詢資料，由於唔識講廣東話，都會嚟搵我幫手，我都唔介意幫佢地。而家我兩個仔都好聽話，得閒就跟我去社區中心參加課程同做義工。

我嘅偶像係家燕姐，佢喺啱啱離婚嘅時候有唸過死，我都一樣。其實生命好寶貴，做人唔好咁易放棄。家燕姐好堅強，而家有自己嘅事業，仲好成功，我視佢為我學習對象。

女性無咗丈夫，一樣可以靠自己。我從無想過自己可以咁本事，而家仲可以教人，生活得咁開心。我好感激曾經幫過我嘅社工。無咗佢地，就無今日嘅我。

(517字)